

ORATIO

DE

IIIS, QVAE CVM VETERES, TVM RECENTIORES,
INPRIMIS BATAVI ET GERMANI, DE VITAE
CORPOREAE PRINCIPIO PHILOSOPHATI SVNT.

ORATIO

(3)

THESE THINGS BEING THE FIRST
OF THE SERIES OF THE
SACRED SCRIPTURES.

BERNARDI FRANCISCI SVERMAN

O R A T I O


D E

IIS, QVAE CVM VETERES TVM RECENTIO-
RES, INPRIMIS BATAVI ET GERMANI,
DE VITAE CORPOREAE PRINCIPIO
PHILOSOPHATI SVNT;

P V B L I C E H A B I T A

DIE XIX IVNII MDCCCX.

QVVM IN ACADEMIA, QVAE EST HARDEROVICI,
MEDICINAE THEORETICAE, ANATOMES, CHI-
RVRGIAE, ARTISQVE OBSTETRICIAE PROFES-
SIONEM ORDINARIAM AVSPICARETVR.



H A R D E R O V I C I,
apud EVERARDVM TYHOFF,
Academiae Typographum.

THE NATIONAL ANTHROPOLOGICAL ARCHIVES

RECEIVED
JAN 10 1908
U.S. NATIONAL MUSEUM
WASHINGTON, D.C.



RECEIVED
JAN 10 1908
U.S. NATIONAL MUSEUM
WASHINGTON, D.C.

1908

THE NATIONAL ANTHROPOLOGICAL ARCHIVES
JAN 10 1908
U.S. NATIONAL MUSEUM
WASHINGTON, D.C.

N I R I S

ILLVSTRIBVS, GRAVISSIMIS,
QVI ACADEMIAE QVAE
EST HARDEROVICI
CVRAM GERVNT,

EDIT QVI E.

QVI HVIC ORDINI AB ACTIS EST,

VIRO CONSULTISSIMO,

SACRVM,

BERNARDI FRANCISCI SVERMAN,

O R A T I O

D E

US, QVAE CVM VETERES TVM RECENTIO-
RES, INPRIMIS BATAVI ET GERMANI,
DE VITAE CORPOREAE PRINCIPIO
PHILOSOPHATI SVNT.

ILLVSTRISSIMI ATQVE GRAVISSIMI ACADEMIAE
HVIVS CVRATORES!

QVI ILLVSTRISSIMO HVIC ORDINI AB ACTIS ES,
VIR CONSVLTISSIME!

MAGNIFICE ACADEMIAE RECTOR!

SALVTEM PVBLICAM HVIVS CIVITATIS QVI CVRA-
TIS ET IVDICIA, QVIQVE ILLIS ES A TABVLIS,
VIRI PRVDENTISSIMI HONORATISSIMI!

PRO-

*PROFESSORES QUARVMVIS DISCIPLINARVM CELE-
BERRIMI, VIRI CLARISSIMI, COLLEGAE CON-
IUNCTISSIMI!*

ARTIS PICTORIAE LECTOR, VIR DEXTERRIME!

*RELIGIONIS CHRISTIANAE ANTISTITES FIDELISSI-
MI, VIRI PLVRIMVM VENERANDI!*

*ARTIVM ET DISCIPLINARVM QUARVMCVMQVE DOC-
TORES CONSVLTISSIMI, PERITISSIMI!*

*GYMNASII VELAVICI RECTOR, CAETERIQVE PRÆ-
CEPTORES DOCTISSIMI!*

*ORNATISSIMA IUVENTVTIS ACADEMICAE CORONA,
PARENTVM AMOR, SPES PATRIÆ, AMICI IN-
TEGERRIMI!*

*QVICVMQVE INSUPER ADESTIS, CIVES, HOSPITES
CVIVSCVMQVE LOCI, ORDINIS ET DIGNITATIS,
AUDITORES EXOPTATISSIMI, HVMANISSIMI!*

Quoties ego vitae meae, huc usque actae, curriculum, eumque, quem iam attigi, scopum, apud animum reputo, — reputo autem quotidie, — toties equidem, hac vero inprimis hora, sacro quodam horrore penitus commoveri me sentio.

Quum me, ex obscuritate privatae vitae, artis salutaris exercitio, iustisque at incertis fructibus ex hoc fonte hauriendis, diligenter intentae, inopinato in lucem protractum, et disciplinae, qua ipse haud ita pridem imbutus essem, publice docendae gratia, Praeceptorum commendatione Maecenatumque favore, in Cathedram Academicam promotum, videam: quin tamen huius loci, ipsiusque adeo Cathedrae, e qua olim Praeceptorum etiam meorum vox resonuit, amplitudo et splendor, Munerisque inprimis mei gravitas me premant et percellant, vos profecto A. A. H. H. in dubium vocare

non potestis, qui me novitium doctorem vana de rebus
suis opinione turgidum non esse novistis: turpi enim
hoc vitio me, spero, absolvent, qui me norunt. Ad-
haec non leviter commovent temporum quae vivimus
difficultas, incertique rerum eventus: quis enim sola
spe, ceterum artes alere non immerito dicta, suam suo-
rumque vitam alat?

Enimvero quisquis pusilli non est animi, fiducia
in summo Numine omnibus prospicienti posita, nil
volentibus arduum esse cogitans, meliora quaevis fa-
cile sperabit, animumque eriget. Quod ergo felix
faustumque sit! ad capesfendi muneris solennia cum
maxime accedere gestio. Qua occasione, quum ex Ma-
iorum more Sermo, de argumento quodam, ex doctri-
nae quam profiteor penu petito, habendus mihi sit,
facere non possum, quin denuo difficultatem in ipso
hoc dicendi limine commemorem, quâ disciplina nostra
eiusque augmenta, a pristinis inde temporibus ad hodie-
rum usque diem, nimis eheu impedita sunt. Uti enim
veteribus artis magistris eorumque praeceptis sic addictos
esse

esse dedecet, ut in eorum verba iuremus, ab eorumque partibus tam religiose stemus, ac si omnem doctrinae ambitum, omnes eius partes tam bene constituissent, ut nulla amplius eorum, quae illi decreverunt, exploratione, nulla praesertim ipsius Naturae perscrutatione assiduaque consultatione opus sit: ita e contrario levis et male fani ingenii est, optima antiquae industriae monumenta fusque deque habere, eorum fructus vel obiter delibare, vel ideo quia antiqui aevi sunt reprobare, at novis decretis solum inhiare, his delectari, novisque saepe longe quaesitis systematibus, quorum alterum alterum trumat et invertat, fabricandis operam dare.

Quae extrema, quantum utraque noceant, verisque scientiae incrementis impedimento sint, vix opus est ut exponam: subsistendo enim et otiose acquiescendo in doctorum veterum placitis, animus auctoritatis occupatur praeiudicio, quod impedit, quo minus veritatis lumen, e melioribus effulgens inventis, densas, quae ei obductae sunt, tenebras penetret et pellat: — spernendo contra et inepte reprobando, quidquid vetustum audit,

quum caeco impetu, prouti fors tulerit, in nova inauditaque feraris, perque campos floribus novis iucundos at fructu vacuos divageris, in devia facile duceris, ubi plus nocivi quam boni colligitur, atque mens adeo laeva fit, ut falsum a vero non recte distinguat.

Ita nimirum, ut illustri utar exemplo, accidit ut, postquam Pater Hippocrates, quarto fere ante Servatorem Jesum Christum natum saeculo, perfectiorem artis medicae scientiam Naturae operationibus accuratissime observandis superstruere coeperat; sex saeculis post, Claudius Galenus, vir doctrinae ubertate non minus illustris quam foecundi ingenii splendore, absolutissimum suum, at contemplatione philosophica mirum quantum refertum et ornatum, medicae doctrinae condiderit systema. Cuius quidem tanta dein in scholis invaluit auctoritas, ut novis artis nostrae incrementis ac melioribus impedimenta obiecerit gravissima: quorum hoc praesertim notamus, quod, caeca fide tanto Praeceptoris habita, perversaque de veritate iam satis inventa opinione abrepti, ipsius assecrae sibi persuaserint,

suaferint, superfluam quin periculosam esse Naturae ad Hippocratis exemplum observationem et per-
scrutationem, neque doctrinae iam ubique receptae, tam consummatae scilicet denuo explorandae emendandae-
ve ullum superesse locum. Imo vero haec Galeni auctoritas, etiam in sequentium Graecorum, Arabum et Europaeorum scholis, per integrum fere tredecim saeculorum decursum perstitit, tanta religione culta, ut a Magistri doctrina vel latum unguem recedere, aut meliora addiscere, nefas haberetur. Quid? quod seriore aevo, postquam sanguinis per arterias et venas motum, perque corpus nostrum circuitum, detexerat et aperte demonstraverat, ingenti hoc merito praeclarus, Harvaeus, antiqui Doctores scholastici inventi veritatem ideo agnoscere detrectaverunt, quia Galenus illud non docuerat; quin nonnulli addidisse feruntur, si tamen de re constaret, novum hoc sibi videri Naturae phaenomenon, sanguinemque adeo Galeni tempore nondum per corpus circumivisse!

Quae quidem caeca brutaque pervicacia, scientiae

augen-

augendae viam omnem praecludens, si vobis risum moveat A. A., quidni applaudatis violento famosi Aurelii Theophrasti Paracelsi, Alchymistae, instituto, qui quum, saeculo tandem XVI, Galeni et Avicennae libros ex Cathedra Basileënsi publice combussisset; scholarum auctoritatem nulla prorsus ratione alia infringendam, fanatico isto furore, concussit, imo fregit, vix quidem meliorem substituens doctrinam, at animos, alto longoque servitutis somno oppressos, ad meliora quaerenda audiendaque expergefaciens. Quod idem deinceps nostrates Helmontius et Sylvius, suo quisque modo, uterque vero magis placide, facere perrexerunt. Donec, veram augendae scientiae naturalis viam monstrante illustrissimo Bacone Verulamio, quem secutus est Boyleus, in arte nostra rectius constituenda ceteris facem praetulerunt Sydenhamus, Boerhavius, Fr. Hoffmannus, alique viri egregii de Hippocratico, quid natura faciat aut ferat observandi et inveniendi, non autem systemata nova ex ingenio fingendi et excogitandi, studio bene meriti. Hac sola
pro-

profecto ratione et via scopulos, ad quos Veri olim indagatores haud raro allisisse dolemus, feliciter praetervehemur. Hac demum ratione et via spes erit, fore ut emendata artis nostrae scientia in diem magis crescat, floreat, utilesque in veram generis humani salutem fructus ferat!

Enimvero metuo A. A. H. H., ne indulgentia vestra, qua mihi admodum opus esse sentio, nimia exordii prolixitate, abusus sim: quapropter ad ipsum, de quo sermo mihi faciendus est, locum quantocyus accedendum esse intelligo. Quae enim de universa doctrina medica dicta sunt, valent quoque de singulis eius partibus. Valent igitur et de nobili loco, qui est de vitae corporeae principio et causa. De quo Philosophi veteres, nec minus Medici, augustum illud Naturae mysterium revelaturi, multa philosophati sunt, nec tamen ita philosophati, ut ipsorum Naturae phaenomenorum rationem haberent, sed luxurianti ingenio frena laxarent. Melius profecto seriori aevo et alii et inprimis nostratium nonnulli in exponenda hacce doctrina versati fuerunt.

fuerunt. Quorum merita utinam et hodie omnes satis suspicerent, neque, quum ipsi nova identidem systemata condere gestiant, contemptim negligerent vel certe obsecrarent !

Itaque, quum vita frui nemini non dulce sit, et in vitae causas inquirere humanum; Medicis vero, quorum ars vitae viribus recte regundis plus valet quam medicamentorum administratione, commendatissimum: vobis A. A. H. H. non displiciturum esse spero, de quo dicere constitui, argumentum; dicam enim *de iis, quae cum Veteres, tum Recentiores, imprimis Batavi et Germani, de vitae corporeae principio philosophati sunt.*

Quod dum ago, viribus meis modeste diffusus, vos A. A. exoptatissimi ! enixe rogatos velim, ut, inexercitato oratori, eique latine dicendi minus perito, nec sponte sua, sed ut antiquo mori obtemperet, ad dicendum accedenti, animis linguisque faveatis.

Corporibus organicis, inter caetera, quae profert Natura, formae et structurae praestantia excellentibus, praeter partes organismum constituentes, principium quoddam et vim inesse debere singularem, qua vivant atque a brutis machinis distincta sint, ab antiquissimis iam inde temporibus perspexerunt, sibi que persuasum habuerunt primi in Graecis disciplinarum cultoribus philosophi. Nec profecto admirabile illud naturae phaenomenon, quo tot millia corporum vivere, vigere, propriamque tueri speciem videbant, tam negligenter observare potuisse videntur, quin ad eius causam animum attenderent.

Fuerunt autem inter Veteres, qui, abditum hoc mysterium revelaturi, ad peculiarem, quam dicebant, Naturae harmoniam confugerent. Fuerunt, qui Geniis, quos Daemones vocabant, ut ingentem per universam rerum Naturam efficaciam, ita et corporum vita imbuedorum facultatem vindicarent. Fuerunt denique, qui cum ignem, cuius permagnam vim quotidiana doceban-

tur experientia, summum omnium in huius mundi universitate rerum effectorem haberent, cuncta producentem, cuncta animantem, tum calorem, qui vitae effectus est, vitae causam salutarent. Omnes vero id, quod invenisse sibi videbantur, argutiis, subtilissimis illis quidem, sed Vero inveniendis parum inservientibus, stabilire conati sunt. O instabilem salutaris artis, tam levibus philosophematis innixae, fortem! Sed ecce! sive divus Hippocrates; sive strenui in schola Asclepiadea, verae philosophandi rationis vindices, scientiam inanibus istis opinionibus subtrahere gestientes, agnoverunt illi quidem singulare quoddam principium, a partibus corporum et continentibus et contentis diversum, τὸ ἐν κοινῷ ipsis dictum, omni vero ulteriori eius definitione sperandae seriorum temporum felicitati et faciendis in rerum scientia progressibus relicta.

Ex iis autem, quae modo breviter de varia Veterum theoria diximus, iam intelligitis A. A., quam laudabilis optimique exempli sit Hippocratica illa et in definiendo prudentia et in enunciando modestia, utraque ex
diligenti

diligenti naturae observatione oriunda. Etiam si enim reliqui in tentanda vitalis principii explicatione desudarint, haec eorum conamina nec certa nituntur ratione, et attendenti vel nudo illo τοῦ ἐνοήτου nomine minus satisfaciunt. Utinam vero, qui Hippocrati successerunt, eximiam magni viri liberalitatem et modestiam vere philosophicam aemulati essent! Quippe Hippocrates, quamvis ab eorum opinione, qui calorem vitae fontem habebant, non plane alienus, leges tamen, quibus Natura operatur, a priori, ut aiunt, non definiendas, sed ab experientia sola, fideli illa rerum magistra, discendas esse voluit.

Verum, o perverfas hominum mentes! tam simplex, tamque apta tempori et scientiae conditioni, de ingenti naturae mysterio meditandi dicendique ratio, Philosophantium post Hippocratem ingeniis neque placere, neque sufficere potuit. — At ne miremini A.A.! Erat enim isto tempore, vix minus quam nostro, hominum ingenium magis in paradoxa speciem habentia proclive, quam in nudam et simplicem verita-

tem. Ita enim proh dolor! comparati sumus, ut, ubi novi quid, qualicunque veri similitudine, atque insuper externa dictionis elegantia sese commendans, in medium prolatum fuerit, hoc, ut cum sapientissimo Albino loquar, et moveat facile homines et teneat. — Igitur, ex Platoni quoque theoria, ignis, at sanguinis calore nutritus et πνεύματος cuiusdam ope, per corpus vectus vitae dictus est fomes. Alii vero, ab experientiae doctrina magis etiam recedentes, inanibus indulserunt contemplationibus, atque vel igni sine isto spiritu, vel spiritui illi soli, eique vitali et animali, speciatim vitae vim tribuerunt: donec, non ita multo post, artibus et disciplinis e Graecia, antiqua Musarum sede, Romam migrantibus, Asclepiades, et πνεῦμα et ignem rejiciens, e peculiari quadam fluidorum subtilium mixtione duntaxat vitam, omniaque eius phaenomena derivare, et explicare fategerit.

Difficile quidem non sit, hanc Asclepiadis theoriam cum alia quadam, quae paucis abhinc annis in Germania inclaruit, de industria componere; sed, et ab aliis

hoc

hoc iam dudum factum est, et sine vestrae attentionis abusu in istum locum excurrere vix liceat. Misfa igitur omni eiusmodi comparatione, id unum observo, hanc theoriam, quae profecto accuratiore investigatione non indigna est, quippe ipsa sua simplicitate, ad rei veritatem propius accedente, sese commendantem; eam igitur, vel ob ipsam hanc laudabilem ceteroquin simplicitatem, eandem sortem quam Hippocraticam fuisse expertam. Locum enim cedere coacta est aliis systematibus, non iis quidem plane novis, sed ex vetustioribus conflatis. Ex hoc genere imprimis Galeni theoria nobis ideo potissimum commemoranda est, quod per longum tredecim circiter saeculorum, sed quibus omnis fere eruditio penes Monachos fuit, decursum substituerit. Excipio Arabes, qui, praesertim in Academiis Hispanicis, tunc temporis diligenter excoluerunt disciplinam medicam, ita tamen, ut eam, de qua hic agimus, quæstionem non magnopere ab iis agitatam fuisse vero sit simile.

Galenus autem, reiecta iterum corpusculari Ascle-

piadis

piadis philosophia, denuo *πνεῦμα* cum calore coniunctum, tamquam vitae principium, quasi postliminio revocavit, cui *calidi innati* nomen indidit. Sumpsit insuper et qualitates quasdam, *occultas* dictas, vim nimirum *vitam* in corde, vim *animalem* in cerebro, *naturalem* in hepate, ceterasque, quas Dogmatici isto aëvo invenerant, ut phaenomenis, adeo simplicibus et aeternis, etiamsi interpretatio, verba certe non deëssent. Non igitur mirandum, doctrinam hanc, quippe tam universe receptam, atque insuper obscuris virium occultarum verbis ulteriori rei indagationi viam praeculentem, effecisse ut, per tam immensum temporis spatium, animi auctoritatis praeiudicio adeo obfuscati fuerint, ut veritatis lumen ad mentis arcem penetrare prorsus non potuerit.

Ergone in fatis erat, ut hominum ingenium, dogmatico loquendi usu non victum modo sed vinctum, iners iaceret! Ast bene factum! tandem aliquando erectioris ingenii Viri, mystico licet Paracelsi enthusiasmo excitati, ad naturalium phaenomenorum observationem denuo accesserunt. Inter hos eminebat, de quo iam locutus

tus sum, Ioannes Baptista Helmontius, nobilis Belgae, qui, institutis physicis ac chemicis experimentis, veram indagandae naturae rationem tenuit, at, quod dolendum, occultae simul et cabbalisticae temporis sui sapientiae nimis tribuit. Excogitavit scilicet Helmontius, ante hos ducentos et quod excurrit annos, novam de vita eiusque causa theoriam. Ens nimirum sibi finxit immateriale, Archaeum ipsi dictum, quod quidem primum se ipsum formaverit, formatum vero in animantium praesertim ventriculo resideat, indeque, summo per omnem oeconomiam animale imperio potitum, corpori vitam impertiatur; vegetam illam, quando tranquillus residet Archaeus; qui vero excitatus vel et furibundus, perque corpus vagabundus, morbum et mortem cieat. Quod quidem sive systema, sive figmentum, etsi ad sanae theoriae laudem adspirare minime potuit, hunc tamen bonum tulit fructum, ut, ex diuturno torpore, ingenia ad proprias vires, in Veri investigatione, periclitandas et explicandas denuo converterentur.

Guilielmus vero Harvaeus, Anglus, postquam momentosissimum suum, de sanguinis circuitu, inventum publici iuris fecisset, eoque novam prorsus perlustrandae ipsius oeconomiae animalis ansam praeberet: priora omnia systemata tandem propulsa fuerunt. Quam gratum auspiciū: ast quam tristis denuo rerum conversio! Propulsa quidem fuerunt et vires illae occultae Galeni, et πνεῦμα atque calor innatus; et Archaeus immaterialis Helmontii, sed insecutum est aliud εἶσθημα, quo corpus vivens in meram machinam, sive automa hydraulicum commutaretur. Cuius quidem theoriae Iatromathematicae condendae ardor originem traxisse videtur ex philosophia Cartesiana. Hinc omnes corporis functiones ex mero mechanismo exponi coeperunt, perinde ac si singulae quaeque actiones, haud aliter ac in Natura mortua, e causa mechanica et chemica sola oriri posset. Ita caloris animalis fons sola frictio habitus fuit; una respirationis causa mechanica pectoris elevatio et depressio: quin nutritionis et secretionis functiones adeo occultas, tum ex humoribus crystallisatis, tum ex

angulis

angulis vasorum rectis, obtusis, vel acutis explicare fategerunt. Neque vero haec mechanismi ad corpus vivens applicatio, etsi modum haud dubie excedens, magnopere obstitisset, si Hermannus ille Boerhavius, cuius doctrina, per viginti fere lustra, in scholis nostratum, velut sol inter sidera, emicuit, lumenque suum quaquaversum diffudit: si, inquam, Vir immortalis totum se huic artis nostrae parti dedisset, nec, uti peritos rei arbitros censere intelligo, nimia fortasse simplicitatis et philosophiae corpuscularis admiratione et studio deceptus, mechanismo hydraulico nimium pretium statuisset: id quod etiam de meritissimo Boerhavii aequali, Frederico Hoffmanno, scholae Germanicae Doctore celeberrimo, alii observârunt.

In aliam longe theoriam, pneumatico - dynamicam illam, descendere, eadem fere aetate, visus est Georgius Ernestus Stahlius, contendens, ab animo nostro omnes motus, etiam vitales, pendere, omnem vitam corpoream animo soli, tanquam Archæo Helmontiano, deberi; quippe qui primum in utero materno

corpus suum iam struat, eius postea motus omnes producat et sapienti consilio regat. Quae quidem doctrina, licet in Germania et Britannia non paucos habuerit patronos, in hac quidem imprimis Meadium, praeclarum quondam Britanniae Regis Archiatrum, et recentiore eo Whyttium, aliosque in schola Edimburgensi doctores clarissimos; in Belgio tamen nostris fautores fere nullos, multos adversarios, nacta est. Quorum, aliorumque egregia pericula, ut meliorem ad Verum inveniendum viam stravisse, ita quoque, ignoscite quaeso A. A. propenso meo in eruditos nostrates animo! dignissima esse mihi visa sunt, e quibus novam quasi doctrinae epocham inchoatam esse existimemus.

Antequam egregia nostratum in vitalis principii theoriâ merita enarrem, temporis ordo postulat, ut paucis clarum Anglo-Britannum Glissonium commemorem. Glissonius enim existimavit, vitam naturae, quae ipsa Viri verba sunt, *actuositatem esse, sub-*

stantiae

stantiae energeticae propriam, ipsi materiae inditam; proposuitque systema a notione, si non psychologica, saltem mechanica prorsus alienum. Vitam quidem, quod Stahlio placuit, ab animo derivavit, neque legibus physicis sive geometrico-hydraulicis, Iatro-mathematicorum instar, adstrinxit, sed corporum viventium vim agnovit peculiarem; praeterea declarato singulari illo fibrarum motricium phaenomeno, quod ipse primus *irritabilitatem* vocavit; sumto tandem spiritu quodam animali, subtili quidem at perceptibili. Cuius sententiae ultimam quidem partem uberius deinceps exposuit illustris Germaniae Doctor Fredericus Hoffmannus; integram vero eandem alii, inprimis Belgae, amplexi sunt; omnibus viribus id agentes, ut eam, ceteris omnibus systematibus ad illud usque tempus inventis, verosimiliorem redderent, et, quoad eius fieri posset, amplificarent. Hos inter, post summum Boerhaviium, eminuit Rega, Professor Lovaniensis, auditor Boerhavii, Vir de disciplina nostra, imo vero de universo humano genere, optime meritus. Ne quid

dicam de praeclaro Boerhavii Nepote, Abrahamo Kau Boerhavio, qui, cum Avunculi doctrina, Belgicae eruditionis famam in disfitas Septentrionis regiones propagavit.

Sed hoc loco non possum, quin paulo uberius excurram in laudes Ioannis Gorteri, Batavi, Viri, acri ingenio, eximia doctrina, studioque indefesso praeclari, qui Cathedram Hardervicensem, inde ab anno vigesimo quinto saeculi proxime elapsi, ornavit. Hic, quum theoriam, quam suo tempore valere videret, obscuriorem, iudicio limato, examinasset, verum a falso, certum a dubio distinguere et didicit et docuit. Sicut igitur universa laudatissimi Viri, in salutari arte, opera, praestantissimis scriptis edendis inprimis probata, tanto omnium applausu excipiebatur, ut vel Petropolim, ad aulam augustissimae Imperatricis, Archiater vocaretur: ita de nostra causa eo potissimum meritis est, quod, etiamsi nervorum energiam vitalem admiserit, subtilius tamen de vitae, motusque vitalis causa, disputaverit, quam actionem dixit viventium peculiarem et

pro-

propriam, eanique adëo ne plantis quidem denegandam, ut hae, non machinarum instar, sola elasticitate moverentur, sed suapte propria vi viverent. Multis autem, iisque maximis, summi Gorteri in disciplinam nostram meritis commemorandis, prudens hic abstineo; unum dictis addendum. Namque ille, quantum scio, primus fuit Boerhavi discipulus, qui, cum unus omnium optime perspiceret, quantum momentum vis vitalis haberet in morbis recte cognoscendis et curandis; ausus est a summi Magistri (cuius immortalia in Medicinam merita nemo Gortero reverentius suspiciebat) theoria, maxime quod ad morbum inflammatorium, recedere. Huius enim perfectiorem theoriã constituit, qua topicam vitalis vis incitatae efficaciam inflammationis causam esse docuit; quae theoria omnibus postea vehementer arrisit. Quid quod vel hodie non pauci eandem istam efficaciam topicam, mutato nomine, (incitationem vocant), denuo commendent.

In hac energiae vitalis ad artis usum applicatione, e temporis ordine nunc laudandus occurrit nostras Fre-

dericus

dericus Winterus, primum in Franequerana, mox Leidenſi in Academia, Medicae artis Profefſor. Winterus nimirum e partium vi irritabili omnia arceſſivit vitae corporeae phaenomena, nec tamen ita, ut, cum Gortero, fluido nerveo hic primas tribueret partes, fed inſignes tantum. Quam vero utilis et foecunda fuerit haec Winteri de vi vitali doctrina, cui jam pridem favebant magni Albin et deinceps illuſtriſſimi Gaubii praecepta; hoc igitur ſcholae Leidenſis, eo tempore, diſcipuli demonſtrârunt. Hos inter Lupſius, Ruſſus, primus fuit, in opuſculo Academico, contendens irritabilitatem vitae non adeo effectum, quam cauſam eſſe, eamque per omnem late Naturam, variis tamen gradibus et modis, diſperſam. Mox Manitiuſ, Boruſſus, idioſyncraſiam et ſpaſmodicas affectiones, non e fluidorum temperie, fed ex ſolidorum vi irritabili, repetendas eſſe docuit. Poſtea Duumviri Belgae meritiffimi, Imanuſ Iacobuſ van den Boſch, morborum obſervator vere Hippocraticuſ, et Lambertuſ Bickeruſ, qui operibus practicis deinceps

ceps inclaruit, ante hos quinquaginta, et quod excurrit, annos, coniuncta opera, instituerunt in vivis animantibus experimenta, ad irritabilitatem solidorumque vitam ulterius perscrutandam, et accuratius constituendam, pulchre excogitata. Neque tandem tacendum est de Clar. Doevereno, qui et Winteri adhuc discipulus, suis experimentis, de partium viventium irritabilitate et sensibilitate rectius dijudicanda, egregie meritus est; mox vero, Groningam vocatus, doctrinam tam physiologicam quam pathologicam de solido, quod vocant, vivo, huiusque prae humoribus longe maiore momento, omni studio amplificavit, ornavit et per discipulos egregios propagavit.

Sed Civium nostrorum amore ulterius abreptis paullulum retrogrediendum nobis esse sentio. Graviter enim peccasse mihi videar, si, hoc item loco, non commemorem eximias, in hac doctrina, laudes Viri, Helvetii illius quidem, sed qui magni nostri Boerhavii, discipulus fuit carissimus, doctrinaeque eius physiologicae commentator tam studiosissimus, ut Praeceptoris

nomine

nomine unum Boerhaviū perpetuo honoraverit. De Alberto Hallero me loqui facile intelligitis A. A., universae profecto scientiae nostrae lumine clarissimo, suiue temporis ornamēto verissimo, qui nimirum, „ neque coelo, neque terra, neque mari quidquam re, „ linquere voluit incognitum.” Qualia autem experimenta A. A. ! quam varia ! quam innumera ! Quanta in veritatis investigatione simplicitas ! Quam a praeiudiciis aliena ! Quanta in concludendo gravitas et modestia ! Quanta denique innumerarum rerum scientia ! De Irritabilitate inprimis tam subtiliter disputavit, ut eam in Halleri laudem Hallerianam vocaverit aequa posteritas. Quinam autem hanc Irritabilitatem inter et nervorum Sensilitatem, illam vitae facultatem nobiliorem, intercedant limites, definire satēgit. Existimavit enim, sensiles non esse membranas, quae cavum abdominis et thoracis investiunt; quibus ossa obducuntur; ligamenta quae corporis haec fulcra coniungunt; corneam oculi tunicam; viscerumque substantiam parenchymatosa: irritabiles contra non esse nervos, partes illas,
nobili

nobili vitae animali adeo necessarias; cutim porro, corpus ab iniuriis externis defendentem; telam cellulofam, per omnem naturam organicam dispersam; tendines insuper vasaque, quae sanguinem vehunt; et paucas partes alias: sed in partibus irritabilibus primum locum assignavit cordis ventriculo posteriori, sanguinem per totum corpus propellenti; proximum vero cordis ventriculo anteriori; tertium intestinis, quae alimenta continent et ducunt; quartum diaphragmati, quod abdomen a pectore separat; ultimum musculis omnibus, quibus motum exferit animal.

Quos omnes et singulos Viri indefessi labores si consideremus, quis, quaeso, nostrum A. A! dubitaverit incomparabilia esse Halleri merita, inprimis in vitae principio investigando? Attamen quam admiranda est summa summi Viri modestia? „Ego vero” inquit, „hic mihi nihil fumo, qui et aliorum ante me virorum labores gratus meis finam praeponi, et quantum a plena veritatis luce distem, lubens me ipsum moneam.” Utinam vero, Hallere, eruditorum maxime! rarae mo-

destinae tuae exemplum omnis artis nostrae cultores in
scientiae salutem sequerentur! — Tanto itaque Viro
quis non, cum Werlhofio, Medico istius temporis
inter Germanos celebratissimo, accinat?

„ Huic lex summa fuit, Naturae voce doceri,

„ Cui Dominae doctas subdidit artis opes,

„ Ingenius veri vel ab hoste nitentis amicus,

„ Censor et erroris candidus ipse fui”!

Sed ad nostrates redeamus. Hi igitur, quippe qui e
novis quibuscunque inventis, quae sibi probabantur, ve-
rum fructum percipere gestiebant, etiam de hac theoria
in usum practicum convertenda optime meriti sunt. De
Gorteri et Winteri hac in re studio meritisque
iam diximus. At horum vestigiis praeprimis institit al-
ter immortalis Boerhavii discipulus, idemque eius,
cum in munere succesor, tum quod summum est ami-
cus, Hieronymus Davides Gaubius. Hic enim,
de doctrina pristina perficienda et emendanda aequè sol-
licitus, universale quoddam principium vitae agnovit,
per omne corpus, (secus ac Hallerus statuerat),

inpri-

inprimis vero per solidas eius partes organicas dispersum. Atque insuper demonstravit, hanc esse vim earum propriam, ab elasticitate aliisque attributis physicis distinctam, communibus legibus vix obnoxiam, at impetu singulari actuosam, idque non modo in statu normali sano, sed vel maxime in statu abnormi morbofo. Denique et viribus Naturae medicatricibus, primus fere omnium, verum pretium statuere docuit, et veterum de morbis humorum doctrinam, solidorum vivorum in fluidis moderandis mutandisque efficacia plenius ostendenda, egregie emendavit. Quibus omnibus effecit vir perspicacissimus, ut plurimi, non tantum inter nostrates, verum etiam inter exteros, magno consensu in partes eius transirent.

Atqui inter Cives nostros, qui eodem isto tempore, eadem de causa, bene meriti sunt, vir illustrissimus, Matthias van Geuns, memorandus mihi inprimis est; mihi, inquam, cui singulari summi Numinis beneficio, haud ita pridem, contigit, tanto Viro praeceptore uti. Hic enim, quem vegeta adhuc artique fa-

lutari fructuosissima senectute fruentem, hic, ubi antē multos annos eandem, ex qua discipulo dicere nunc licet, Cathedram ornavit, adesſe inpenſe gaudeo, quique ut Traiectinis, quorum cum maxime lumen eſt et gloria, diu ſuperſtes et incolumis ſervetur, ex animo precor:— hic igitur Vir eruditissimus, iam ante hos quinquaginta duos annos, inclareſcere coepit, in lucem editis duobus opusculis academicis, altero de *vitae corporeae* ratione et cauſis, de *Mortis* altero: quorum illo, ſtudioſe perpenſis tam Priſtinorum, quam Recentiorum, in his Gorteri noſtri, Halleri et praeceptorum ſuorum, Doevereni, Winteri, Albini, Gaubii- que ſententiis; examinata inſuper Roberti Whyttii Britanni, quam univerſae ſcholae Edimburgenſi perſuaſerat, opinione fere Stahlianā; denique adhibitis propriis in hanc rem experimentis et induſtria id egit, ut concinnum, ac pro ea aetate omnibus partibus numerisque abſolutum, doctrinae noſtrae biologicae compendium conficeret, idque a dubiis ſecus ſentientium liberaret.

Itaque,

Itaque, constituta vitae corporeae notione, eiusque a vita, quae corpori cum mente communis est, necessaria distinctione, in vitam mox corpoream eiusque principium, causas et modos accuratius inquisivit, et naturam eius vel characterem posuit in partium viventium organicarum, harumque fibrarum, vi motrice propria, irritabili vel excitabili dicta; quoniam hae partes vel sponte sua moveri observantur, vel saltem ad motum et actionem vitalem paratae esse et promptae, quum primum idoneo stimulo ad agendum veluti excitantur. Hanc ergo vim vitalem existimavit ipsis fibris motricibus originetenus inhaerere, tanquam vim sui generis, a ceteris quidem viribus et corporum qualitatibus diversam, iisque nobiliorem, at physicam tamen et vere corpoream, quae neque a principio isto tertio, neque a mente, neque a nervis, neque aliunde, advena fit, etiam si apto tali influxu adiuvari utique soleat et augeri. Stimulos porro et incitamenta quaecunque non magis veras actionis vitalis causas esse, quam e. g. incubatio causa sit formati et crescentis in ovo pulli, vel

ignis

ignis scintilla, pulveri pyrio admota, explosionis stupendae. Praeterea, communibus naturae corporeae legibus nihil contrarium accidere, quum valde blandus stimulus vehementiorem motum et reactionem provocat, quam qui a fortiori stimulo existit; quippe quo ipsa fibra vitalis male afficiatur aut adeo corrumpatur. Ad haec irritabilitatem hanc cum vera sensibilitate confundendam non esse; quum prior solis fibris motricibus priva sit, posterior solis nervis, functione animali ab illis valde diversis. Insuper non agnosci debere verum stimuli sensum in fibra; quum fibrae facultas, stimulum alterum prae altero vel cupiendi vel percipiendi, quaerenda sit in sola dispositione fibrae organicae, ad stimulum certum quemdam excipiendum maxime apta et idonea. Denique, vis huius vitalis sedem et locum notabiliorem quidem esse in fibris muscularibus, sed agnoscendam tamen etiam in organicis omnium universi corporis partium fibrillis, ut ne tela quidem cellulosa, tanquam universae texturae, ex Halleriana doctrina, primordium, excipienda prorsus videatur; cui tamen hic infimus gradus
asfig-

assignandus sit, quandoquidem, quo perfectior organismus redditur, eo etiam vis vitae consummatiores esse censetur. — Hac autem theoria, uti insignis virium vitalium in oeconomiam nostram, tam in statu sano quam in morbo, efficacia in plenioris lucem adducta est, ita etiam nova sed apta denominatio theoriae dynamicae, ab isto inde tempore potissimum apud Medicos, invaluit.

Ignoscite quaeso A. A. ! insigni, quo praeceptorem optime de me meritum prosequor, amoris, longioris huius theoriae enarrationem. Ignoscetis utique, si et rei momentum apud animos vestros perpendatis, et summi insuper Blumenbachii auctoritatem. Hic enim Vir eruditissimus, Georgiae Augustae grande decus, qui in Physiologica doctrina omnium consensu principatum tenet, in institutionibus suis, quadraginta, post conscriptum a Geunzio nostro libellum, annis in lucem editis, de viribus vitalibus acturus, solum illud Geunzii opusculum sibi laudandum esse censuit.

Ex pluribus porro popularibus nostris, qui postea
florue-

floruerunt, unum adhuc memorasse suffecerit. Ver-
schurium, qui amplificanda, novisque experimen-
tis stabilienda, vasorum sanguiferorum vi irritabili, eo-
rumque effectu peculiari, tam bene meruit, ut eximias
tulerit, etiam summi Halleri in extrema senectute,
laudes.

Verum enim vero, dum hic Belgarum celebri labo-
res, videri possum aliarum gentium merita tacendo eleva-
re velle: quod profecto secus se habet. Alii sane, quod
minime diffiteor, inter Germanos, Italos, Britannos et
Gallo-francos fuere, qui in vitae principio investigando
egregie desudaverunt. Hoc ut demonstrem, vix est
quod moneam de praestantissimis Halleri discipulis.
Quis enim non magni faciat de Solitudinis aestimatione,
 deque Experientia medica tam bene meritum scriptorem
 Zimmermannum? Quis non in honore habeat Zin-
 nium, qui, uti eleganter oculum delineavit humanum,
 ita quoque se ipse sagacissimum praestitit observatorem?
 Quis non maxime laudet praestantissimum Ludwigium,
 qui multis et doctissimis operibus scribendis inclaruit?

Quis

Quis non meritisimis extollat laudibus eximium humani generis amicum Tisfotum? Quis non summopere celebret Fabrium Parisinum? Quis non Caldanium Paduanum? Quis non Felicem Fontanam Pisanum? ne de tot aliis dicam, qui singuli in eadem palaestra strenuissime sese exercuerunt. — Quorum excellentium Medicorum in indaganda veritate industriam, in eadem profitenda constantiam, denique in explorandis, sive Veterum sive Recentiorum Doctorum, sententiis prudentiam et aequitatem, utinam omnes, qui nostra memoria id sibi negotii datum esse existimarunt, ut et ipsi de Vitae principio disfererent, nunquam non fuissent imitati. Sed eheu miseram hominum conditionem! laetissimam diem atra denuo nox excepit.

Itaque nunc, ex ordine dicendi mihi proposito, veniendum est ad ferioris atque adeo hodierni temporis opiniones de vitae principio, novas illas, si Diis placeat, sed inter se repugnantes; omnes tamen et alibi et

praesertim in vicina Germania modo propositas defensasque, mox impugnatas et reiectas; quarum pleraeque in sanioris detrimentum theoriae videntur esse excogitatae, praestantissimis Nostratium, de quibus exposuimus, studiis nullo loco habitis, fortasse ne cognitis quidem, nedum ad maiorem perfectionem adductis. Id quod tamen in eam sententiam minime accipiendum, quasi de omnium, qui hac vel illa nova opinione delectantur, Virorum laudibus quicquam detractum velim, a qua profecto temeritate dicam an impudentia, et insignia haud paucorum merita, et aetatis meae cogitatio me faciunt alienissimum.

Quodsi igitur apud animos nostros attentius reputemus, quot et quanta, sive in metaphysicis, sive in physicis inventa, ne de nonnullorum hypothesebus dicam, symbolas contulerint ad commutandam plerarumque disciplinarum, in iis medicae, faciem; quis nostrum dubitaverit, et Physiologiam corporis humani et istam eius inprimis, quae de vitae principio exponit, doctrinam ingentes mutationes subire debuisse; quod

ita quoque evenit. Qua de re exposituro hanc mihi veniam date A. A. ! ut non per omnes, quae hac aetate per Europam sparsae ac ventilatae sunt, opiniones divager, quo ipso attentionem vestram fortasse nimium fatigarem, sed praecipuas tantum, e quibus ceterae fluxisse videntur, breviter indicem. — Mittam igitur non tantum ea, quae vel Ernestus Platnerus, Viri clarissimus, ante hos viginti annos, fere ad antiquatam Stahliani sententiam, denuo in medium protulit, vel quae et alii et Barthesium Franco-Gallus, ex mechanicis principiis, Iatromathematicorum instar, derivare sategerunt; verum imprimis permultas istiusmodi opiniones praetermittam, quae, nulla prorsus Naturae perscrutatione innixae, insatiabili tantum novitatis studio ortum debuerunt, et simul fere cum inventione et ortu interierunt. Dicendum vero mihi incumbit de quadruplici philosophandi de vitae principio ratione, cuius vel Britannici, vel Franco-Galli, vel Germani auctores, postremi vero praecipue exornatores exstiterunt.

Saeculum nimirum proxime elapsum versus finem

vergebat, quum nova philosophandi ratio, Criticam vocant, omnibus disciplinis, in his Medicæ, insignes commutationes minitaretur. Kantius quidem eius auctor, et Fichtius, Kantii discipulus, nostræ arti proprium quasi locum assignabant, iis eam accensentes doctrinis, quæ, phaenomenis Naturæ innixæ, nullum alium ac experientiam fontem agnoscerent. Quod, etsi nec momento nec utilitate caret, effectus tamen habuit valde noxios, non eos quidem ipsi philosophiæ criticæ, sed maxime criticorum philosophorum dictioni tribuendos. Ut enim ipsi inter huius sectæ philosophos Coryphaei passim obscuriore oratione usi fuerant, ita inperitiores eius asseclæ ansam inde defumpserunt, quæsitis verborum sesquipedalium formularumque vix intelligendarum involucris investiendi res notissimas et levissimis hypothecis, absurdissimis erroribus, quin et thesibus, nullum revera sensum fundentibus, sublimitatis quamdam quasi speciem conciliandi, et incautis per inanessonos et verba mente casâ imponendi. Quæ calliditates, cum in aliis tum in salutari arte, magnos motus

cierunt

cierunt, novarumque rerum cupidis, splendentibus ver-
bis inventis novas quoque veritates sese didicisse, per-
suaserunt.

Tristem istam sortem inprimis experta est doctrina
de vitae principio. Nam Biologia quidem pro principe
totius Medicinae parte haberi coepit; verum adeo non
vestigii Halleri ac Belgarum, quae Blumenba-
chius, Sömmerringius, Reillius ac reliqui Viri
praeclari legebant, insisti; ut potius, neglecta dili-
genti Naturae perscrutatione, unica ad Verum invenien-
dum via, de Vita eiusque principio vel infantium instar
balbutirent, vel enthusiastarum more nugarentur, vel
adeo declamationes poeticas, verbaque *μυσνηώδες* aliquid
spirantia, ignorantiae praetenderent.

Quod ne cuipiam temere ac proterve dixisse videar,
attendite quaeso A. A. ad istas vitae definitiones, qui-
bus illi, qui splendido *Philosophorum Naturalium* titulo
ornantur, rem obscurissimam illustrare conati sunt.
Schellingius, magni nominis inter Germanos Philo-
sophus,

sophus, omnem materiam corpoream, eiusque tam compositionem, quam solutionem habuit negativam Vitae conditionem. Sed veram Vitae causam statuit esse tertium quoddam principium universale positivum, quod Animam mundi vocat, per omnem naturam dispersum, sed tantummodo actuosum, ubi corpora invenit sibi recipiendo apta. „Hoc,” inquit, „principium perpetuum, veluti flumen magneticum, quod minimam a-
 „cum nauticam aequae afficit in mari aperto ac in quo-
 „vis occluso terrae loco, eique ubivis directionem
 „polaricam impertit; hoc igitur principium, fluminis
 „vitalis instar, organa ferit sui recipiendi capacia, iisque
 „cum ferierit actuosam vitam tribuit.” — Hanc vero Schellingii, de immateriali vis vitalis principio opinionem, (a Darwinio Anglo itidem defensam,) qui paulo attentius consideret, quis non protinus cogitet de illo Galeni πνεύματι, vel de aethereo veterum principio, quod universum mundum pervadere et animare statuebant; quo fere sensu ille:

„Esse — — partem divinae mentis et haustus
 „Aethereos — — namque ire per omnes
 „Terrasque, tractusque maris, coelumque profundum,
 „Hinc pecudes, armenta, viros, genus omne ferarum
 „Quemque sibi tenues nascentem arcescere vitas.”

Ab hac, de qua diximus, magni Schellingii sententia vix aliter ac verbis discedere videntur alterius Schellingii *cogitata de idea Vitae*, quae eo fere redeunt, ut in absoluta, tam operandi facultate, quam existentiae unitate Vita quaerenda sit. Sed haud paullo aliter Treviranus Vitae principium dixit facultatem absolutae, quae ex externis diversi generis potentiis existit, pugnae resistendi, iisque Harmoniam tribuendi. Aliter iterum Waltherus vitae causam sitam esse docet in rerum *egoismo*, id est in earum nisu, ipsi *πρωτότυπος* (ideale recentiores vocant) quantumpote respondendi, propriamque huic formam, inde a primis elementis usque ad ultimam consummationem, sine ulla mutatione, retinendi.

His omnibus occurrit Troxlerus, qui reliquorum
 philoso-

philosophemata emendaturus ; „ Vita,” inquit, „ est
 „ aliquid, quod non apparet et non est, id est appari-
 „ tio et existentia in se, sive id quod revera absolu-
 „ tum; Graecorum *ὄντως ὄν*. Non itaque quaerendum in
 „ mundo sive intelligibili sive sensibili, sed utroque
 „ praestantius. Vita vero sub apparitione et existentia
 „ delitescens, quoniam alterutri subiciebatur, dudum
 „ non recte cognita fuit, sed pro effectū causa, pro
 „ principio consequens habitum. Revera Vita et appa-
 „ ritionem et existentiam continet, illa sola causa est,
 „ hae modo iudicium. Quapropter Vita a se ipsa modo
 „ cogitari et enunciari potest.” Et alibi Poetam fere
 agens idem „ id, quod est,” inquit, „ quodque ap-
 „ paret, vivit; quod vivit, praestigiis obedit apparitionis
 „ et existentiae: in hisce Vitae praestigiis ipsa condita
 „ iacet Vita, veluti mysterium miraculo, miraculumque
 „ mysterio plenum. — — Vita est causa et tanquam
 „ causa immortalis: causa enim immortalis est Vita.
 „ Aeterna est apparitio, infinita existentia: quod enim
 „ aeternum et immortale est, iudicium est eius, quod
 „ est

est immortale. Id quod in apparitione aeternum est,
est Deus, et quod in existentia infinitum, Natura."

Proh superi, quantum mortalia pectora coecae

Noctis habent.

Nunc transeundum est in Galliam, quae, quamvis ante aliquot annos terribili horrendoque concitati populi tumultu quasfata, artibus tamen placidum perfugium non omnino negavit; id quod nova, qua Chemia eo tempore aucta fuit, perfectio vel maxime comprobatur. Vanae enim adversum artem chemicam fuerunt sine viribus irae, quam fundamento inexpugnabili superstruxit Lavoisierius, barbarae, quae tunc temporis in optimos quosque faeviit, immanitatis victima, at meritis tamen immortalis. Hoc igitur Viro summo praeunte et adiuvante eximius ibidem Fourcroyus, alique Viri praeclari bene multi, universae Chemiae, atque adeo scientiae Medicae novam lucem affuderunt, tenebras pristinas densamque caliginem pellentem.

Quid mirum, si hanc etiam viam a multis ad doc-

trinam de Vita illustrandam tentari ista aetas viderit? Praestantissimus fane inter Germanos Medicus Girtanner, momentosum illud Atmosphaerae elementum, quod oxygeneticum dicitur, pars aëris vivifica dici meretur, quippe potissimus ad vitam excitandam stimulus, pro ipso Vitae habuit principio. Quidni ignem potius? quem, jam ante hos bis mille annos, pari fortasse iure, ad vitalis causae dignitatem evexit Pythagoras. — Klappius quoque fluidum nerveum, dudum in oblivionem adductum, et postliminio revocavit, et ex acido animali cum materie combustibili iuncto oriri, perque vasa musculorum manare, et Vitam ipsam chemica affinitate producere finxit. — Ackermannus vero ex intima unione albuminis cum aura oxygena omnem arcessivit Vitam, omniaque eius phaenomena. — Quid? quod eximius Reillius, a chemica istiusmodi explicatione non alienus, Vitam a diversa materiae mixtione et forma derivavit. Hi igitur omnes, vel emendandae de vitali principio doctrinae nova illa inventa chemica adhibuerunt; vel adeo (quod minus videatur laudari

laudandum, et Fourcroyo, maximae in hisce auctoritatis Viro, iam displicuit) omnem vitalis virtutis explanationem a chemicis principiis repetierunt. Pauci tantum, ex ista schola, processui huic chemico ingentem quidem tribuerunt in Vitam animale[m] efficaciam, at simul tamen vim peculiarem, ab actione ista chemica omnino diversam, tenuerunt.

Accedo nunc ad tertiam de Vita philosophandi rationem, quae ex Scotia ad reliquas Europae partes pervenit, et, levitati Auctoris ortum debens, multos ubi-vis sectatores habuit. Nimirum Ioannes Brownius, in schola Edimburgensis Magistri Culleni, Viri summo ingenii acumine illustris, praeceptis saluberrimis vix mediocriter imbutus, nulloque adhuc usu proprio confirmatus, ut primum discipulorum subsellia reliquit, statim Doctorem agere gestit; Doctorem autem agere? imo vero, immaturum novi systematis foetum enitens, universae disciplinae medicae aliam longe faciem reddere gestit. Erat utique Brownii (Paracelsi quasi redivivi) ratio, ut ad speciem simplex, sic ad eorum pa-

latum, qui, compendiaria litteris studendi via delectati; molestum illum, quo solo iustus doctrinae apparatus acquiritur, laborem refugiunt. Hinc igitur repetendum videtur, quod tam multis, praesertim in Germania, cum universo suo systemate, hanc etiam, quae res nos maxime nunc tangit, opinionem probaverit, vitam esse statum naturae coactum, a conditionibus externis sive incitamentis et a potentiis internis incognitis pendentem; quorum effectus sit qualitas occulta, Incitabilitatem vocavit, ulteriorem perscrutationem non admittens.

Hac vero Brownii hypothesi, nullo idoneo fundamento superstructa, ecquis non videat ulteriori isti Naturae actuosae perscrutationi viam praecludi, in qua tot Viri celeberrimi, inter Nostrates potissimum, laudabilem operam collocarant: ingeniumque adeo humanum in anguitos, e quibus olim relicta Galeni doctrina se expedierat, coecae occultarum virium admirationis cancellos detrudi; quo magis mirandum ne eos quidem omnes, qui crassam Brownii theoriam in universum defendi posse negarent, a defendenda occulta

culta ista vitalis principii causa non abstinuisse.

Sed, misa Brunoniani commentii levitate, transeamus ad quartam, quae Italiae debetur, in Germania vero perpolitata est, de vitae principio theoriam. Orta ea est casu fortuito, qui, ut momentosissimorum inventorum, tam in Vita, quam in artibus, passim auctor esse deprehenditur, ita hic quoque ingenio humano, novam ad Verum inveniendum viam monstravit. Clarissimus nimirum Bononiensis Galvani, vis electricae, cuius efficaciam in corpus animale iam cognoverat, naturam ulterius exploraturus, ranas, ferreis coercitas bacillis, cupreo hamulo attigit; quo facto motus musculorum convulsivos, levissimo metallorum diversi generis attractu, cieri admirabundus animadvertit.

Auditis A. A. ! fortuitam gravissimi phaenomeni observationem, quae plantulam retulit subito in arborem excrescentem, adhaerentibus tamen haud paucis plantis parasiticis. Etenim plurimi, hoc eventu ingeniosi experimenti comperto, protinus sibi persuaserunt, nunc se Vitae principium et rationem plane perspexisse; quapropter

ter:

ter actionem vitalem procesum vocarunt galvanicum. Ipse inventi Auctor, quae est ingenii nostri imbecillitas, ab ista opinione haud prorsus alienus fuisse videtur, quippe qui musculos lagenis comparavit Leidenfibus, extus negativa, intus positiva pollentibus electricitate. Alii vero, iique valde praestantes, maxime in Germania, Viri, institutis novis experimentis id unice egerunt, ut Galvanismi efficaciam demonstrarent in procesum vitalem, quam inde tamen explicare non sustinuerunt. Hae ingenii pariter ac prudentiae laude insignes sunt inter alios Sömmerringius, Reillius, Ritterus, praesertim vero immortalis Humboldtius, qui tanquam Halleri aemulus, „ neque coelo, neque terra, neque „ mari quidquam relinquere voluit incognitum.”

Utinam vero omnes, quas praesertim Germania peperit, opiniones utilitatis foecunditate aequae commendabiles fuissent, ac ultima haec ratio, quae sic dictum Galvanismum in scenam produxit, quae saltem potentiarum, quae dicuntur, imponderabilium, in Vitam organicam efficaciae detegendae atque accuratius definiendae ansam

dedit!

dedit! Verum enimvero si eadem industria, eodem labore indefesso, quo Batavi irritabilitatem ceterosque vis vitalis fontes et formas varias pridem indagaverunt, in theoriam illam perficiendam incubuissent nostri temporis homines; quidni laetiores scientiae nostrae, solidioribus iam superstructae fundamentis, lucem affulsuram fuisse speremus?

Ast vereor A. A. H. H. ! ne vestra, qua dicentem tamdiu sustinuistis, patientia tandem aliquando abuticentear. Quapropter ad perorationem transeundum esse video. Vos itaque honoratissimi Artis salutaris Magistri et Studiosi! nunc apud animos vestros statuere, quid sit in tanta opinionum, quas recensuimus vel certe tetigimus, diversitate nobis sequendum, quaenam sententia potissimum amplectenda. Equidem, pace vestra, et in omni scientiae nostrae studio, et imprimis hac quoque in parte, hunc Veri indagandi modum eligendum, hanc legem nobis scribendam esse existimem, ut, quamdiu vivimus, scientiam perficere et emendare studentes, doctrinam antiquam, experientia et ratione nobis probatam,

nunquam vilipendamus tanquam obsoletam, neque adeo eam cum novis quibusvis hypothesibus protinus commutare gestiamus; sed nec nova, praesertim ubi vera videantur et momentum haud leve habere, alto supercilio spernamus, verum ex praecepto sacro omnia ita exploremus ut bona retineamus, inque usum nostrum diligenter convertamus, reliqua mittamus tanquam crepundia, Viris, iisque inprimis sapientibus, indigna. Itaque sequamur utilissimum perspicacissimi Angliae Cancellarii, illustris Baconis praeceptum; „ non fingendum aut excogitandum „ esse, sed inveniendum, quid Natura faciat aut ferat.” — Utinam vero ad commendandam praestantissimam eam, quam e Nostratibus multos aliis praeivisse vidimus, disciplinae nostrae excolendae et perficiendae rationem etiam mea nunc aliquid adferre queant conamina!

Quum enim vestrae, Viri gravissimi! huius Musarum sedis Curatores amplissimi! perquam benignae de studiis meis opinioni, eique a sola meorum, quos consulistis, Praeceptorum commendatione profectae, debeam, quod ego,
nuper-

nuperrime inter Artis Doctores receptus, iam, Serenisimo Rege vestrae opinioni subscribente, ad honorificam Medicinae in hac Academia professionem vocatus sum; stipēs equidem sum necesse est, si non sentiam, ad officia, quae muneris gravissimi a me ratio postulet, exsequenda non pia sufficere vota et desideria, sed toto pectore, omnibusque animi et corporis viribus mihi agendum esse, ut, si minus spartam, quam nactus sum, ornare et splendidissimi muneris dignitatem tueri queam, certe benignam vestram de me opinionem et susceptam spem non turpiter fallam. Quod et per se longe difficillimum esse, probe intelligo, hac nostra aetate ac scientiae Medicae conditione, et eo difficilius, quod Viro, et doctrina et arte longissime praecellenti, clarissimo, inquam, Manenio, ad alios a Rege honores et munia hinc evocato, ego, cui curta adhuc supellex est, successor datus sum. Sed iacta est alea. Studiis ergo meis et industria, quam indefessam fore polliceor; his igitur adspirante, quod supplex precor, Deo optimo maximo, ac favente vestra, Viri amplis-

fimi ! quam iam per annum fere expertus gratus agnosco, benevolentia, hoc certe sperare audeo, me ipso usu edoctum iri, volentibus nihil arduum esse; quum, quaecumque tandem mea sit tenuitas, hoc certo habeam propositum, ut officio fungendi voluntate a nemine vinci me patiar. Quod superest, supremum rerum humanarum Moderatorem veneror, ut vestra, Viri spectatissimi! consilia in Academiae nostrae, humanae societatis, ac vestrum ipsorum emolumentum et commodum perpetuo prosperare dignetur.

Vos iam mihi compellendi estis, Viri admodum honorandi, disciplinarum quarumvis Profesores clarissimi, quos mihi honorifico Collegarum titulo salutare contingit! Humanitatem, qua me excepistis, imo vero amicitiam, qua me beavistis, ut ex animi mei sensu praedicem, ubinam idonea ego verba inveniam? Excepistis hominem omnibus Vobis ignotum, atque aetate insuper, doctrina, experientia longe minorem. Quid igitur mirum, si eo maiore gaudio perfusus sim, ubi in interiorem vestram familiaritatem ultro a vobismitterer,

quo magis, modeste mihi diffusus, veritus fueram, ut tanto honoris et benevolentiae documento dignus haberer. Ut itaque et in posterum Vobis, Viri celeberrimi! gratus sim et acceptus, utque me, hominem, meritorum vestrorum observantissimum, vestro, sicut facitis, amore prosequi et prudenti consilio imperitum ducere et sublevare pergatis, enixe Vos rogo et obsecro! Ego vero nihil antiquius, prius nihil me habiturum esse spondeo, quam ut ine vicissim talem Vobis praeitem, qui nec collegii, in quod coöptatus sum, honorificentissima necessitudine indignus, et ingenuo animi candore ac propensissima in vos omnes voluntate, et vero paratissima ad quaevis amicitiae officia praestanda promptitudine, nemini secundus esse censear.

Tua inprimis amicitia gaudere mihi porro liceat, clarissime Kraufi! cui arctius me iungit communis disciplinae vinculum. Annus iam fere agitur, ex quo ego talem in Te suspexi eruditionem, tantamque humanitatem, ut nesciam utro laudis genere mihi videaris dignior. Quanto autem magis inter se cohaerent studia

nostra et ex se neſtuntur; quanto maior eſt diverſarum, quae ſingulis nobis docendae ſunt, diſciplinæ Medicae partium neceſſitudo mutua, tanto certe maiore opus eſſe ſentio operae noſtrae et induſtriae coniunctione et communitate. Hoc ergo conſilio meam Tibi amicitiam Batava fide et candore commendatam cupio. Quod tanto magis facere audeo, quo blandiore alloquio me modo de Cathedra ſalutaſti, benignumque tuum ergo me animum publice ſignificaſti.

Te vero Senex venerande, clarifſime Nieu hoviſ cuius gravifſima de Philoſophia, Matheſi ac Phyſica praecepta prima et ſolida iaciunt fundamenta Phyſicae de hominis natura doctrinae, mihi uberius, ac data opera, tradendae; Teque clarifſime Rozebo mi! quem Chemiae ac Botanices ſcientia Iuventutem noſtram inſtituendi provincia cum noſtra quoque diſciplina coniungit; Vos igitur, Viri Eruditifſimi! inſalutatos dimittere, neſas duco: vobis me meaue commendatiſſima velim. Utinam unanimi ſtudio et recte ſociata opera laudatiſſimorum Civium academicoꝝ, quorum cura nobis eſt demandata,


doctri-

doctrinam perficere et amplificare feliciter nobis contingat!

In Vobis tandem laetissime desinat Oratio mea, ingenui Iuvenes, Commilitones optimi! qui in hac bonae mentis palaestra exercemini. Vos inprimis, qui Medicae disciplinae pectora consecraftis. Audivistis quam multa et quam diu, cum a Philosophis, tum a salutaris artis profesforibus, de vera principii vitalis notione disceptata sint; simulque, uti spero, intellexistis quae-nam utilitas ex prudenti opinionum diversarum, etiam apud nostri temporis homines obviarum, cognitione et applicatione hauriri possit et debeat; ast grave simul perspexistis detrimentum, quod ex temeraria reprobatione omnium, quae vetusta audiunt, nostra etiam scientia ceperit. Tali ergo consilio Naturam ante omnia perscrutemur humanam, ut ab hac cognitione ad prosperam non minus quam adversam valetudinem recte curandam bene parati simus.

Vobis itaque Iuvenes, qui Aesculapii castra sequimini, ego, cuius indolem et docendi rationem Vos, ab
aliquo

aliquo iam tempore, ipso usu cognovistis, Vobis solemni hoc die et ritu, denuo me studiorum vel ducem vel comitem toto animo offero, cui profecto nil sanctius erit, nil gratius accidet, quam si utilisimis vestris studiis egregie inservire mihi detur, atque hac ratione amore vestro et benevolentia beari!



2. *Chrysomelidae*
Chrysomelidae

Chrysomelidae
Chrysomelidae

Chrysomelidae
Chrysomelidae

Chrysomelidae
Chrysomelidae

Chrysomelidae
Chrysomelidae

Chrysomelidae
Chrysomelidae

Chrysomelidae
Chrysomelidae

